

Unammilleqatigiinneq pillugu Inatsisartut Inatsisaata allangortinnissaa pillugu Inatsisartut Inatsisaat (Niuertarfinnik paasiniaaneq, immikkoortortamik misissuinerit, Unammilleqatigiinnermut Ataatsimiititaliap toqqaanera, taasinnermut maleruagassat ingerlasinnaassuserlu, suliffeqarfiup allagaatinik takunnissinnaanera, killigititamik unitsitsineq il.il.)

§ 1

Unammilleqatigiinneq pillugu Inatsisartut Inatsisaat nr. 1, 15. maaji 2014-imeersoq, tak. Unammilleqatigiinneq pillugu Inatsisartut inatsisaat pillugu Namminersorlutik Oqartussat nalunaarutaat nr. 2, 26. marsi 2021-meersoq, Inatsisartut Inatsisaat nr. 55, 25. novembari 2024-meersumi allangortinneqartumi, ataani allanneqartut allangortinneqassapput:

1. § 20-mi imm. 6-7-tut ilanngunneqassapput:

” Imm. 6. Imm. 1-4-ni killigititat immikkuullarissumik unitsinneqassapput, tassani Unammilleqatigiinnermut Ataatsimiititaliaq kattunneq akuerineqassanersoq pillugu nalilersuinissaminut paasissutissanik noqqaassuteqarsimappat, aamma

Piumasaqaat, suliffeqarfiit peqataasut ilaannit naleqquttumik pissuteqarluni ilanngunneqarsinnaanera, peqqutaavoq, aamma

Unammilleqatigiinnermut Ataatsimiititaliaq aaliangersimasumik akissuteqarnissanut killigititaqarpoq, suliffeqarfullu peqataasup ilaannit unioqqutinneqarsimalluni.

Imm. 7. Killigititamik unitsitsineq, tak. imm. 6, paasissutissat noqqaassutigineqartut ataatsimiititaliamut tunniunneqarnissai tikillugu, killigititaq atatinneqaannassaaq.”

2. Kapitali 6-imut qulequtaq ima oqaasertaliorneqarpoq:

“Kapitali 6

Tamanut ammatitsineq, allagaatinik takunnissinnaaneq aamma inummut paasissutissanik suliarinninneq”

3. § 24 ima oqaasertaliorneqarpoq:

” § 24. Pisortat ingerlatsinerat pillugu paasitneqarsinnaatitaaneq pillugu Inatsisartut inatsisaat Inatsisartut inatsisaat manna malillugu sulianut atuutinngilaq, tassani ilaanatik § 4, imm. 2, § 7, imm. 6, § 8, imm. 2, 2. pkt., § 9, 2. pkt. § 10, imm. 1, § 11, imm. 6, § 12, imm. 3, 2. pkt., § 12, imm. 5, 2. pkt., § 15, imm. 4, § 17, imm. 3, § 26, imm. 3, aamma § 34, imm 3 malillugit aalajangersakkanik aalajangersaanissaq pillugu suliat.

Imm. 2. Suliani una Inatsisartut Inatsisaat malillugu aalajangiiffigineqareersimasuni aalajangiiffigineqartussaniluunniit, suliffeqarfiit, uppersaatini atugaat pillugit paasissutissanik imaqarpata, imm. 1-imi takunnissinnaatitaanermut pisinnaatitaagaluaanniluunniit, paasissutissat sunilluunniit imaqaraluarpata, Pisortat ingerlatsinerat pillugu paasitneqarsinnaatitaaneq pillugu Inatsisartut inatsisaanni § 4, imm. 2 naapertorlugu takunnissinnaatitaasut.

Imm. 3. Paasissutissat imminnermut tunngasut pillugit takunnissinnaatitaanermut pisinnaatitaaneq, tak. imm. 2, suliffeqarfik pillugu paasissutissat uppersaatini, suliffeqarfiup allap teknikikkut paasissutissaatai, periusai aamma ingerlatsinermit suliffimmilu atukkat aamma paasissutissat allat allanit takuneqartussaangitsut pillugit, allaqqasunut atuutsinneqanngilaq.

Imm. 4. Suliani, una Inatsisartut Inatsisaat malillugu aalajangiiffigineqartussani, Pisortat ingerlatsinerat pillugu paasitneqarsinnaatitaaneq pillugu Inatsisartut inatsisaanni § 6, imm. 1 assinganik atorneqassaaq.

Imm. 5. Pisortaqarfimmut allamut Inatsisartut Inatsisaat malillugu paasissutissat ingerlateqqinneqarsimappata, imm. 1-4 aappiullugu atuutissaaq.”

4. § 24-p kingorna ilanngunneqassaaq:

” § 24 a. Aalajangiissutit uku il.il. oqartussaasunit akisussaasuusuniit tamanut ammasumik saqqummiunneqassapput:

Unammilleqatigiinnermut Ataatsimiititaliap tunngavilersuutitut oqaaseqaataa.

Naalakkersuisut § 2, imm. 4 malillugu akissuteqaatai.

Atuisartoqarnermut Unammilleqatigiinnermullu Aqutsisoqarfiup Unammilleqatigiinnermut Ataatsimiititaliaq sinnerlugu aalajangiissutai, tassani aalajangiussaq Inatsisartut Inatsisaannik atuinermut paasinnissinnaassutsimut pingaaruteqarpat imaluunniit tamanit soqutigineqarpat. Suliani § 38-mut innersuussuteqartoqartillugu parnaarussassanngortitsisoqassaaq imaluunniit akiligassiissuteqartoqassaaq. Tamanut saqqummiussineq eqqartuussummit, akiligassitsinnermit imaluunniit tassanga eqikkaanermut pissaaq.

Imm. 2. Unammilleqatigiinnermut Ataatsimiititaliaq Unammilleqatigiinnermut Ataatsimiititaliap suleriesia paasissutissiissutaalu pillugit tamanut saqqummiussisinnaavoq.

Imm. 3. Imm. 1 aamma 2 malillugit tamanut saqqummiinnermi teknikikkut atukkat pillugit paasissutissat, ilisimatuutut misissuinnermut, nioqqusioriaatsimut, nioqqutinut kiisalu ingerlatsinermit aamma suliffeqarfiup isertugaatai pineqartumi ilaatinneqarlutik, tamanut saqqummiunneqassanngillat, tassani paasissutissat pineqartumut imaluunniit suliffeqarfiup aningaasaqarneranut pingaaruteqarpata. Aammattaaq suliffeqarfimmi sullinneqartut aaliangersimasut pillugit paasissutissat, Aningaasaqarnermut Nakkutilliisunit nakkutigineqartut, tamanut saqqummiunneqassanngillat.

Imm. 4. Unammilleqatigiinnermut Ataatsimiititaliamut paasissutissanik tunniussisussaq, ataatsimiititaliap siulittaasua, imm. 3 tunngavigalugu paasissutissat tamanut saqqummiunneqannginnissaannut, aamma ataatsimiititaliami ilaasortanut tunniunneqannginnissaannut piumasaqaateqarsinnaavoq. Siulittaasog paasissutissat qanoq annertutigisumik tamanut saqqummiunneqassanersut pillugit inerniliissummik

aalajangiissaaq.”

5. § 24 a-p kingorna ilanngunneqassaaq:

” § 24 b. Inatsisartut Inatsisaat malillugu suliani misissuineruunilu paasissutissiinissamut pisussaaffik inunnut paasissutissanik suliarinnittarneq pillugu inatsimmi kapitali 8 aamma 9 atuutsinneqassanngilaq.”

6. § 27, imm. 2, ima oqaasertalerneqarpoq:

” Imm. 2. Ataatsimiititaliami siulittaasoq ilaasortallu Naalakkersuisunit ukiut sisamakkaarlugit toqqarneqartassapput. Piffissaliussap qaangiunnerani nutaamik ataatsimiitialiortoqarsimangippat, ilaasortaareersut atorfirminni ingerlaannassapput, tassani nutaamik ataatsimiitialiortoqarnissaa tikillugu.”

7. § 27, imm. 5, ima oqaasertalerneqarpoq:

” Imm. 5. Naalakkersuisut ilaasortaq ataaseq atuisartoqarnermut kattuffinnit ataatsimoortuni inassuteqarneq malillugu aamma ilaasortaq ataaseq immikkut pisortat inuussutissarsionermik ingerlatsinerannik ilisimasaqartoq kommuninit ataatsimoortuni inassuteqarneq malillugu Naalakkersuisut toqqassavaat.”

8. § 27-mi imm. 5-ip kingorna nutaatut ilanngunneqassaaq:

” Imm. 6. Naalakkersuisut atuisartoqarnermut pissutsinut ilisimasalimmik Unammilleqatigiinnermut Ataatsimiititaliamut ilaasortassamik toqqaassapput. Ataatsimiititaliap allattoqarfia toqqaanissamut qaammatit pingasut qaangiutsinnagit tamanut ammasumik tusagassiuutitigut aamma Atuisartoqarnermut Unammilleqatigiinnermullu Aqutsisoqarfup nittartagaatigut saqqummiussissaaq, tassani soqutiginnittut atorfirmut qinnuteqarsinnaaniassammata.”

Matuma kingorna imm. 6 imm. 7-ingussaaq.

9. § 27-p kingorna ilanngunneqassaaq:

” § 27 a. Unammilleqatigiinnermut Ataatsimiititaliaq allakkatigut taasinikkut imaluunniit ataatsimiinnermi aalajangiussissaaq.

Imm. 2. Ataatsimiititaliaq, siulittaasoq, imaluunniit peqataasinnaangippat siulittaasup tulliata, minnerpaamillu ilaasortat allat pingasut, peqataaneranni aalajangiisinnaavoq.

Imm. 3. Ataatsimiititaliap aalajangiussai nalinginnaasumik taasinermi amerlanerussuteqarnikkut aalajangiiffiqineqassapput. Taasinermi amerlaqatigiittoqassappat, siulittaasup, imaluunniit peqataanginnerani siulittaasup tulliata, taasina inerniliunneqassaaq.”

10. § 30 ima oqaasertaliorneqassaaq:

” § 30. Unammilleqatigiinnermut Ataatsimiititaliaq aamma Atuisartoqarnermut

Unammilleqatigiinnermullu Aqutsisoqarfik, Inatsisartut inatsisaat malillugu pisinnaatitsissuteqarnikkut suliaminnik suliaqarnissaminut paasissutissanik, inuit imaluunniit inatsisitigut inuttut pisinnaatitaasut noqqaassummik tigusaqartut iserfigisinnaasaanik, noqqaassuteqarsinnaapput, kiisalu inatsisartut

inatsisaanni aalajangersakkani atukkanut tunngasut ilaatinneqartut pillugit nalilersuinissaminnut atugassaminnik noqqaassuteqarsinnaallutik.

Imm. 2. Unammilleqatigiinnermut Ataatsimiititaliap aamma Atuisartoqarnermut

Unammilleqatigiinnermullu Aqutsisoqarfiup aningaasaqarnermut saqqummiussat, paasisutissat, atuakkat assilineri, suliffeqarfiup paasisutissaatai allat elektronikkikkullu paasisutissanik toqqorsiviit noqqaassutigisinnaavai.

Imm. 3. Imm. 1 malillugu suliffeqarfik, suliffeqarfiit kattunnikut, inuit imaluunniit inatsisitigut inuttut pisinnaatitaasut paasisutissiinissaminut pisussaaffeqarput.

Imm. 4. Ataatsimiititaliap aqutsisoqarfilluunniit paasisutissanik noqqaassutigineqartunik tigusinissaanut piffissamik killigititamik naleqquttumik Atuisartoqarnermut Unammilleqatigiinnermullu Aqutsisoqarfik inissiissaaq.

Imm. 5. Imm. 1-imi paasisutissat taaneqartut Atuisartoqarnermut Unammilleqatigiinnermullu Aqutsisoqarfiup Sverigemi, Norgemi, Islandimi, Finlandimi, Savalimmiuni Danmarkimilu, tak. § 34, unammilleqatigiinnermik oqartussanut ikiuinermini atornissai aamma piumasarneqarsinnaapput, oqartussat taakku namminneq nunaminni unammilleqatigiinneq pillugu malittarisassanik atuinissaat siunertaralugu.”

11. § 30-p kingorna ilanngunneqassaaq:

” **§ 30 a.** Atuisartoqarnermut Unammilleqatigiinnermullu Aqutsisoqarfik Unammilleqatigiinnermut Ataatsimiititaliap aaliangersimasumi arlalinniluunniit nioqquteqartuni nioqqutinik misissuisoqarnissaanut imaluunniit inuussutissarsiornermi aaliangersimasumut arlalinnuluunniit ilusilersuinissamut aaliangernerata kingorna aallartitsisinnaavoq, tassani Unammilleqatigiinnermut Ataatsimiititaliap isumaqarpat, inuussutissarsiornerup unammilleqatigiinneranut innarliisumik sunniuteqarpat.

Imm. 2. Unammilleqatigiinnermut Ataatsimiititaliap imm. 1 malillugu aaliangiinerata kingorna, Atuisartoqarnermut Unammilleqatigiinnermullu Aqutsisoqarfik ataatsimiititaliap niuerfimmik misissuinissaq pillugu aallarniutissamik allagaqaataa tamanut tusarniaassutigineqaaqassaaq.

Imm. 3. Unammilleqatigiinnermut Ataatsimiititaliap imm. 1 naapertorlugu Atuisartoqarnermut Unammilleqatigiinnermullu Aqutsisoqarfik niuerfimmik misissuisoqassasoq, Atuisartoqarnermut Unammilleqatigiinnermullu Aqutsisoqarfiup matumani misissorneqartussat nalunaarutigalugit tamanut saqqummiissaaq.

§ 30 b. Atuisartoqarnermut Unammilleqatigiinnermullu Aqutsisoqarfik, niuerfimmik misissuinermini arlaannik aaliangersimasumik pissusilimmik imaluunniit inuussutissarsiornermi arlalinnik unammilleqatigiinnermut sunniuteqartoq nalilerpagu, aqutsisoqarfiup iliuuserisassatut peqqussuteqarsinnaavoq.

Imm. 2. Peqqussutit inuussutissarsiuqartuni unammilleqatigiinnermut sapinngisamik ajoqusiinnginnissai anguniarlugu unammilleqatigiinnerlu ingerlalluuartinniarlugu suliffeqarfimmumut, suliffeqarfinnut kattunnikunut imaluunniit inatsisilerituumut kimulluunniit tunniunneqarsinnaapput.

Imm. 3. Peqqussut piffissami aaliangersimasumi piffissaligaanngitsumilluunniit atuutsinneqarsinnaavoq.

Imm. 4. Aqutsisoqarfiup niuerfimmi attuumassuteqartut pisortaqarfillu peqqussuteqannginnermi tusarniaaffigeqqaassavai.

Imm. 5. Imm. 1 malillugu peqqussut unammilleqatigiinnermut isumannaarisumik naammaginarthuussaaq, pisariaqarlunilu naleqquttuulluni.

§ 30 c. Atuisartoqarnermut Unammilleqatigiinnermullu Aqutsisoqarfik suliffeqarfimmit, suliffeqarfinnut kattunnikunit imaluunniit inatsilerituumit neriorsuuteqalersitsisumik aalajangiisinnaavoq:

Atuisartoqarnermut Unammilleqatigiinnermullu Aqutsisoqarfiup nalilerpagu, inuussutissarsiuteqartuni iliuutsitsigut periutsitigulluunniit inuussutissarsiutigisaanni pineqartumi unammilleqatigiinnermut innarliisoqarpat, aamma

Aqutsisoqarfiup nalilerpagu, neriorsuutit inuussutissarsiutigisaanni pineqartumi innarliissutinut ikiuutaasinnaappata unammilleqatigiinnermullu siursaataallutik.

Imm 2. Aqutsisoqarfiup niuerfimmi peqataasut pisortaqaqarfillu peqqussuteqartigani tusarniaaffigeqqaassavai.

Imm. 3. Imm. 1 malillugu aalajangiinerit piffissami aaliangersimasumi atuutsinneqartassapput, imaluunniit piffissamik killiliussaqaqngitsumik, pisussaaffigisamik neriorsuut nalunaarutigineqarnerata kingorna, Atuisartoqarnermut Unammilleqatigiinnermut Aqutsisoqarfik § 30 b, imm. 1 malillugu peqqussuteqarnissamut, tunngavissaqarunnaartoq inissittassavaa. § 29, imm. 2-3, assingusumik atorneqartassaaq.

§ 30 d. Atuisartoqarnermut Unammilleqatigiinnermullu Aqutsisoqarfik § 30 b, imm. 1 malillugu peqqussuteqarpat imaluunniit § 30 c, imm. 1 malillugu neriorsuummik pituttuisumik aalajangiippat, aqutsisoqarfik suliffeqarfinnut, suliffeqarfinnut kattunnikunut imaluunniit inatsilerituunut suliami peqataasunut ilisimatitsissummik nassiussissaaq.

Imm. 2. Atuisartoqarnermut Unammilleqatigiinnermullu Aqutsisoqarfik § 30 b, imm. 1 malillugu peqqussut pillugu aalajangiussaq aamma § 30 c, imm. 1 malillugu neriorsuummik pituttuisumik aalajangiussaq tamanut saqqummiussinnaavaa. 1. pkt. malillugu aalajangiissutimut missingersuummik tamanut saqqummiussineri § 24 a, imm. 3 assingusumik atorneqartassaaq.

Imm. 3. Atuisartoqarnermut Unammilleqatigiinnermullu Aqutsisoqarfik § 30b, imm. 1 malillugu peqqussuteqartigani imaluunniit § 30 c, imm. 1 malillugu neriorsuummik pituttuisumik aalajangiussaqartigani, Atuisartoqarnermut Unammilleqatigiinnermullu Aqutsisoqarfiup illua-tungeriinnut aalajangiussaq nassiuteqqaassavaa.

Imm. 4. Illua-tungeriinnit oqaaseqaateqarnissamut tunniussinissamut killigititaq sapaatit akunneranik arfnilinnik sivissuseqarpoq.

Imm. 5. Suliani, sulianik suliarinnittarneq pillugu inatsit malillugu tusarniaasoqassappat, oqaaseqaateqarnissamut killigititaq sapaatit akunnerinik pingasunik sivissuseqarpoq, tassani suliaq Unammilleqatigiinnermut Ataatsimiititaliamut saqqummiunneqareersimangippat. Kingullermi pineqartumi Unammilleqatigiinnermut Ataatsimiititaliaq sapaatit akunnerinik pingasunit sivikinnerusumik killigititassamik inissiisinnaavoq.

§ 30 e. Atuisartoqarnermut Unammilleqatigiinnermullu Aqutsisoqarfik Unammilleqatigiinnermut Ataatsimiititaliap niuerfimmik misissuinissamik aaliangiineraniit kingusinnerpaamik ukiut marluk qaangiutsinnagit tamanut saqqummiussinnaavoq, tak. § 30 a, imm. 3, ataani allaqqasut pillugit aalajangiinerit:

a. § 30 b, imm. 1 malillugu peqqussuteqarneq,

b. § 30 c, imm. 1 malillugu neriorsuummik pituttuineq, imaluunniit

c. Niuerfimmik misissuineq naammassineqartoq pillugu tamanut saqqummiussineq.

Imm. 2. Atuisartoqarnermut Unammilleqatigiinnermullu Aqutsisoqarfik qaammatit arfinillit tikillugit killigitamik kinguartitsilluni aaliangiisnaavoq, matumanilu aaliangiineq tamanut saqqummiullugu.

Imm. 3. Inatsisartut Inatsisaanni §§ 31 aamma 32 Atuisartoqarnermut Unammilleqatigiinnermullu Aqutsisoqarfup § 30 a, imm. 1 malillugu niuerfimmik misissuinerani assingusumik atorineqartassaaq.

§ 30 f. Atuisartoqarnermut Unammilleqatigiinnermullu Aqutsisoqarfik immikkoortumik aaliangersimasumik misissuisinnaan-ngussaaq imaluunniit immikkoortortani aaliangersimasuni unammilleqatigiinnermut pissutsinut paasisaqarnerorusulluni immikkoortortani assigiinngitsuni (immikkoortortamik misissuinissamat) isumaqatigiissuteqarnikkut misissuisinnaanngussaaq.

Imm. 2. Atuisartoqarnermut Unammilleqatigiinnermullu Aqutsisoqarfup imm. 1 malillugu misissuinissaminut nakkuginnilluni misissuinerit atorineqartillugit §§ 31 aamma 32-mi aalajangersakkat assingusumik atuupput.

Imm. 3. Atuisartoqarnermut Unammilleqatigiinnermullu Aqutsisoqarfik, § 24 a, imm. 3-mi aalajangersarneqartut malitsigisai, killigalugit imm. 1 malillugu misissuinerup inernerit pillugit tamanut saqqummiussisnaavoq.”

12. § 34, imm. 1 aamma 2 ima oqaasertalerneqarpoq:

” Atuisartoqarnermut Unammilleqatigiinnermullu Aqutsisoqarfik unammilleqatigiinnermi pisortaqaqarfusunut allanut, Atuisartoqarnermut Unammilleqatigiinnermullu Aqutsisoqarfup nipangiussimatitaanermut pisussaaffia malillugu, aamma pisortaqaqarfik unammilleqatigiinnermut inatsiseqarnerat pisariaqartumik ersarissarniarlugu, Naalagaaffeqatigiinnermilu Kalaallit Nunaata illugiimmik aamma amerlasuunik peqataaffigineqartunik pisussaaffinnik pisussaaffeqaqarnerup naammassineqarnissaa qulakkeerniarlugu, paasissutissanik tunineqarsinnaatitaallunilu tunniussisnaatitaavoq.

Imm. 2. Unammilleqatigiinnermi pisortaqaqarfusunut allanut paasissutissanik ingerlatitseqqiinnermi, Atuisartoqarnermut Unammilleqatigiinnermullu Aqutsisoqarfup paasissutissat ataani allaqqasunik naammassinninersut qulakkeeqqaassavaa:

1) tiguisusaaq assingusumik nipangiussimatitaanermik pisussaaffeqartoq,

2) illugiimmik amerlasuunilluunniit peqataaffigineqartumik isumaqatigiissutip atuutsinneqartup inissinneqaarnerani atorineqarnissaa kisiat siunertarlugu, matumani paarlaateqatigiinneq naapertorlugu ingerlanneqassappat, aamma

3) Atuisartoqarnermut Unammilleqatigiinnermullu Aqutsisoqarfimmit ersarissumik pisinnaatitsissuteqarnermi kisiat ingerlatitseqqinneqarsinnaasut, pisinnaatitsissutillu siunertaanut kisiat ingerlateqqinneqassasut.”

13. § 34-p kingorna ilanngunneqassaaq:

” **§ 34 a.** Atuisartoqarnermut Unammilleqatigiinnermullu Aqutsisoqarfik sulianik suliarinninnermini atukkaminik uppersaatit tamanut saqqummiisnaavoq, tassungalu pingajuusumit oqaaseqaatit pisariaqartinneqarpata. § 24 a, imm. 3, tamanut saqqummiussinnermi assingusumik atorineqartarpoq.”

14. § 37 ima oqaasertaliorneqarpoq:

“ **§ 37.** Naalackersuisut imaluunniit Naalackersuisunit matumannga akuerineqarluni pisussaatinneqartoq, ataani allaqqasuni ullormut imaluunniit sapaatip akunnikkaarlugit akileeqqussutinik peqqussuteqarsinnaavoq:

1) Inatsisartut Inatsisaat malillugu Unammilleqatigiinnermut Ataatsimiititaliap imaluunniit

Atuisartoqarnermut Unammilleqatigiinnermullu Aqutsisoqarfiup noqqaassutigisinnaasaat,

2) Inatsisartut Inatsisaanni nalunaarutigineqarnikut malillugit piumasaqaammik imaluunniit peqqussummik naammassinnineq, imaluunniit

3) neriorsuummik pituttuisunngortinneqarsimasumik naammassinnineq, tak. § 29 imaluunniit § 30 c, imm. 1.

Imm. 2. Imm. 1 malillugu akileeqqussutit, Nunatta Karsianut ikineqartassapput.”

15. § 38, imm. 1, nr. 11-mi, ”§ 29, imm. 1”-ip kingorna: ”imaluunniit § 30 c, imm. 1,” ilanngunneqassaaq,”

16. § 38, imm. 1, nr. 12-imi, ”§ 29, imm. 2,”-p kingorna: ”imaluunniit § 30 b, imm. 1,” ilanngunneqassaaq,”

17. § 38, imm. 1, nr. 14, ima oqaasertaliorneqassaaq:

“ 14) Unammilleqatigiinnermut ataatsimiititaliamut imaluunniit Atuisartoqarnermut

Unammilleqatigiinnermullu Aqutsisoqarfimmu imaluunniit immikkoortoqarfimmik misissuinermi

paasissutissanik eqqunngitsunik imaluunniit tammartitsisunik tunniussaartoq imaluunniit suliamut

paasissutissarsiorfigisamut paasissutissat pingaartut nipangiunneqarpata.”

§ 2.

Inatsisartut Inatsisaat ulloq 1. juuli 2026-mi atuutilissaaq.

Imm. 2. Inatsisartut Inatsisaat suliffeqarfinnut kattunnikunut, tassa kattunnissamut isumaqatigiissuteqareersimasunut, piginnittussamit neqerooruteqartoqareerneratigut imaluunniit piginneqataasoqaruni Inatsisartut inatsisaata atuutsinneqalinnginnerani aqutseqataanissamut piginneqataasumik, atuutsinneqassanngilaq. Kattunnerni taamaattuni inaatsisit maannamut atuuttut atuussapput.

Namminersorlutik Oqartussat, ulloq 25. juuni 2026

Jens-Frederik Nielsen (atsior.)

Naalackersuisut Siulittaasuat

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut